

brennen/ vnd ire junge Manschafft mit dem Schwert erwürgen / vnd ire junge Kinder tödten / vnd ire schwanger Weiber zuhawen. Hasael sprach/ Was ist dein Knecht der Hund / das er solch gros ding thun solt? Elisa sprach / Der **HERR** hat mir gezeiget / das du König zu Syrien sein wirst.

VND er gieng weg von Elisa / vnd kam zu seinem Herrn / Der sprach zu jm / Was sagt dir Elisa? Er sprach / Er saget mir / Du wirst genesen. Des andern tags aber nam er den Kolter vnd tuncet in in wasser / vnd breitet in vber sich her / Da starb er. Vnd Hasael ward König an seine stat.

Hasael König zu Syrien.

2. par. 21.

In fünfften jar Joram des sons Ahab des königs Israel / ward Joram der son Josaphat König in Juda. Zwey vnd dreissig jar alt war er da er König ward / vnd regiert acht jar zu Jerusalem. Vnd wandelt auff dem weg der könige Israel / wie das haus Ahab thet / Denn Ahabs tochter war sein weib / vnd er thet das dem **HERRN** vbel gefiel. Aber der **HERR** wolte Juda nicht verderben / vmb seines knechts Dauds willen / wie er jm geredt hatte / jm zu geben ein Liecht vnter seinen Kindern jmerdar.

Joram 8. jar König in Juda.

Zu seiner zeit fielen die Edomiter ab von Juda / vnd machten einen König vber sich. Denn Joram war durch Sair gezogen / vnd alle Wagen mit jm / vnd hatte sich des nachts auffgemacht vnd die Edomiter geschlagen / die vmb in her waren / Dazu die Obersten vber die wagen / das das volck floh in seine hütten. Darumb fielen die Edomiter ab von Juda / bis auff diesen tag. Auch fiel zur selben zeit ab Libna.

Edomiter von Juda abgefallen.

Libna.

Was aber mehr von Joram zu sagen ist / vnd alles was er gethan hat / Sihe / das ist geschrieben in der Chronica der könige Juda. Vnd Joram entschlief mit seinen Vetern / vnd ward begraben mit seinen Vetern in der stad Daud / Vnd Ahasja sein son ward König an seine stat.

2. par. 22.

In zwelfften jar Joram des sons Ahab des königs Israel / ward Ahasja der son Joram König in Juda. Zwey vnd zwenzig jar alt war Ahasja / da er König ward / vnd regierte ein jar zu Jerusalem / Seine mutter hies Athalia eine tochter Amri des königs Israel. Vnd wandelt auff dem wege des hauses Ahab / vnd thet das dem **HERRN** vbel gefiel / wie das haus Ahab / Denn er war Schwager im hause Ahab.

Ahasia 1. jar König in Juda.

VND er zoch mit Joram dem son Ahab in streit wider Hasael den König zu Syrien / gen Ramoth in Gilead / Aber die Syrer schlugen Joram. Da keret Joram der König vmb / das er sich heilen liesse zu Jesreel / von den schlegeln / die jm die Syrer geschlagen hatten zu Rama / da er mit Hasael dem Könige zu Syrien streit. Vnd Ahasja der son Joram der König Juda / kam hin ab zu besuchen Joram den son Ahab zu Jesreel / Denn er lag krank.

IX.



Elisa aber der Prophet rieß der Propheten kinder einem / vnd sprach zu jm / Gürtle deine lenden / vnd nim diesen Olekrug mit dir / vnd gehe hin gen Ramoth in Gilead. Vnd wenn du da hin kompst / wirstu daselbs sehen Jehu den son Josaphat / des sons Amsi / Vnd gehe hin ein vnd heis in auffstehen vnter seinen Brüdern / vnd füre in in die innerste Kamer. Vnd nim den Olekrug vnd schüts auff sein Heubt / vnd sprich / So sagt der **HERR** / Ich hab dich zum Könige vber Israel gesalbet / Vnd solt die thür auffthun / vnd fliehen vnd nicht verziehen.

Jehu.

VND der Jüngling des Propheten / der Knabe gieng hin gen Ramoth in Gilead. Vnd da er hin ein kam / Sihe / da sassen die Heubtleute des heers / Vnd er sprach / Ich hab dir Heubtman was zu sagen. Er sprach / Welchem vnter vns allen? Er sprach / Dir Heubtman. Da stund er auff vnd gieng hin ein / Er aber schüttet das Ole auff sein Heubt / vnd sprach zu jm / So sagt der

Jehu.